

BERPECAH BELAH DI DALAM ISLAM KERANA TIDAK MENGIKUT PANDUAN

Penulis rencana ini, al-Ustaz Jamal ‘Arafāt, Setiausaha Badan Penuntut Kemerdekaan Negara-negara Islam di Mesir, adalah telah bermurah hati menjadikan dirinya sebagai penulis Qalam di Mesir dan negara-negara Arab setelah ia melihat dan menatap majalah ini di majlis orang-orang Arab Maghribi di Mesir. Mudah-mudahan perhatiannya kepada majalah Qalam ini akan member faedah dan manfaat kepada pembaca-pembaca terutamanya atas tujuan merapatkan lagi persaudaraan di antara umat-umat Islam sedunia di dalam suatu cita-cita yang satu, mengikut ajaran al-Quran dan al-Hadis. Di bawah ini ialah rencananya yang pertama – sebagai pengenalan atas tujuan cita-cita yang mulia itu.

SAUDARA

(oleh al-Ustaz Jamal ‘Arafāt)

Wakil Qalam di Kaherah

Dengan inayah Tuhan yang Maha Kuasa telah mengurniakan umat Muhammad SAW bertanah airkan negeri-negeri yang amat indah, tanah-tanahnya subur dan makmur dengan tanam-tanaman dan kekayaan buminya; dan telah menjadikan bangsa-bangsa dan kaum-kaum Islam sebaik-baik bangsa dan seelok-elok umat, serta sebanyak-banyaknya tentang mempunyai persediaan bagi mengerjakan kebajikan, maka sifat-sifat dan kebolehan itulah yang telah menyebabkan mereka sanggup memikul dan meneruskan utusan ketuhanan yang telah dipertanggungkan kepada Nabi mereka dan dengan itu telah tunduklah kepada mereka sebesar-besarkan kerajaan di bumi dan dapatlah mereka menuaikan tuntutan iradah Tuhan azza wajalla pada menyebarkan keadilan dan kemakmuran.

Tetapi manakala orang-orang Islam mulai tergelincir daripada panduan-panduan dan petunjuk yang telah dijelaskan al-Quran dan ajaran-ajaran agama mereka yang Maha Suci, maka mereka pun berpecah belah, berjauh-jauhan, kecil kedudukan mereka pada pandangan orang lain, dan lemah pendirian mereka. Mereka pun menjadi contoh bagi kaum-kaum yang telah tergelincir dari jalan yang benar dan menderitalah mereka akan segala bencana dan ujian yang sedang menimpa mereka pada hari ini.

Inilah menjadikan tiap-tiap seorang yang berjiwa Islam mempunyai kesedaran: mengetahui dan terasa akan bahaya-bahaya yang sedang menimpa umatnya dan segala kejadian yang sedang mereka berada di dalamnya itu. Sebenarnya kesemuanya itu mengendaki dan mendesak orang-orang Islam menyungguhkan perjuangan mereka dan bersatu padu dalam bekerja mengembalikan riwayat kedudukan mereka yang cemerlang sebagaimana keadaannya pada masa yang lalu. Apabila kita berkehendakkan menghasilkan yang demikian maka kita dikehendaki dari sekarang mengebas debu kemunduran daripada diri kita dan bekerja terus supaya suara kita kedengaran bergema di seluruh alam Islami bahkan di seluruh dunia.

Saudaraku:

Masa sekarang tidak menghendaki kita berlaku lemah dan bergerak dengan terdemut-demut tetapi kita dikehendaki bekerja terus-menerus dan berkurban. Tiap-tiap seorang di antara kita adalah wajib di atasnya bersedia memikul perintah-perintah Islam dan menuaikannya sebagaimana orang kita yang dahulu telah menuaikannya, supaya kita dapat menuju ke matlamat yang jauh yang telah ditentukan arahnya bagi kita oleh utusan Islam yang dibawa oleh junjungan kita Rasul Allah ‘alaih wasallam’ iaitu ke arah tangga kemajuan dan kesempurnaan, dan dengan itu dapatlah kita mengembalikan semula kedudukan kita yang sejati dan dapatlah kita menunjukkan diri bahawa kita sebenarnya adalah sebaik-baik umat yang telah terbentuk di tengah-tengah masyarakat dunia!

Masa yang orang-orang Islam sekarang berada di dalamnya sebenarnya

sedang patuh dengan kejadian-kejadian yang berbahaya dan menyediakan manakala seterus-seterus Islam pula tidak sunyi daripada menyediakan bagi kita berbagai-bagai angkara. Sekarang tidak ada peluang yang sangat-sangat sesuai bagi kita selain daripada bekerja terus membina perpaduan umat Islam dan menguatkan kedudukannya. Tiap-tiap kelemahan yang terbit daripada kita adalah bermakna suatu celah yang akan meloloskan tangan seterus-seterus dan pihak yang berniat khianat kepada kita, iaitu suatu perkara yang telah disedari oleh setengah penganjur-penganjur Islam di seluruh alam Islami lalu bekerja dengan seberapa daya upaya dan sekadar iman dan azam yang ada pada mereka. Dengan itu menjadilah bandar-bandar Kaherah, Karachi, Jakarta, Damsyik dan Baghdad medan kecergasan pergerakan Islam yang sangat-sangat luas dan sedang bertambah besar menurut bertambahnya fikiran tersebut di otak orang-orang yang sedang bekerja kerananya rasanya hanya suatu masa yang pendek maka kita akan mendengar kemudian daripada itu suara-suara yang nyaring dan bergema. Selain daripada kerja-kerja yang mendapat sepenuh-penuh kejayaan, menuju ke arah asas yang tetap teguh, yang di atasnya kita akan dapat membina tubuh lembaga Islam yang kekal abadi, biidhni Allah!

Sementara kita menunggu bergema suara-suara yang tersebut

maka hendaklah kita bersedia dari sekarang, Tuhan ada bersama kita. Wallah walī taufiq.

Perkataan yang lemah lembut itu melembutkan hati-hati yang lebih keras daripada batu-batu besar, dan perkataan yang kasar itu mengasarkan hati yang lebih halus daripada sutera.

* * *

Orang yang berakal itu mempunyai dua kelebihan: Akal yang memberi faedah dan perkataan yang berguna.

* * *

Orang yang berakal hendaklah menjaga dua macam: Tipu daya musuh-musuhnya dan kedengkian kawan-kawannya.

WASIAH YANG BERHARGA

Semudah-mudah urusan ialah masuk ke dalam perumahan; dan sepayah-payah urusan ialah keluar daripadanya.

* * *

Akal itu tumbuhnya sebagai tumbuh tanaman-tanaman dan tumbuhnya itu dengan ilmu dan pengalaman.

* * *

Tiap-tiap perkataan yang tidak ada peringatan kepada Allah itu lali; dan tiap-tiap diam yang tidak ada padanya hal berfikir itu lupa dan tiap-tiap pandangan yang tidak ada padanya pelajaran itu sesia.

* * *

Sejahat-jahat manusia ialah orang yang tidak mengambil endah manusia memandang jahat kepadanya.

* S * *

Tidak akan dapat engkau mencapai maksud melainkan dengan bersusah payah; dan tidak akan sampai kepada kemuliaan melainkan dengan budi pekerti.

* * *

Hendaklah ada akalmu itu di bawah agamamu dan percakapanmu di bawah pekerjaanmu dan pakaianmu di bawah darjatmu.

* * *

Lapang hati itu lebih baik daripada saku yang penuh.

* * *

“Demi (Tuhan yang) diriku dalam peliharaanmu, sesungguhnya seseorang daripada kamu mengambil tali lalu ia memikul kayu api ke atas bahunya maka yang demikian lebih baik daripada ia dating kepada seseorang meminta sedekah mahupun orang itu memberi atau tidak” – maksud Ḥadīth Ṣaḥīḥ riwayat al-Tirmizī dan Nasaī.